

## **Radunonza generala dils 11 da mars 2015**

### Plaid dil niev president Lorenz Alig

#### **Preziadas amitgas, stimai amitgs dalla Pro Idioms**

La gronda raspada ch'ei oz cheu serimnada ha fatg a mi grond'impressiun. Quella manifestaziun senza paregl ei d'evident'impurtonza per il moviment actual dils Romontschs. L'elecziun sco president e successur da Heinrich Berther ei per mei ina grond'honor. Da vegnir eligius cun ina tala maioritad ei per mei ina nov'experiencia, sun jeu numnadamein disaus da cumbatter grevas lutgas electoralas e da contonscher, suenter grondas stentas e suadetschs, alla fin l'elecziun cun minimals avantags. Bien engraziament per l'elecziun, per la Vossa confidanza e per il Vies sustegn universal.

Jeu surpren il mandat dil presidi dalla Pro Idioms cun perschuasium, cun grond plascher e cun la prontadad da s'engaschar en favur da nies bi lungatg romontsch. Jeu sun denton era pertscharts che jeu surpren buca gest ina lev'incumbensa. Semetter els calzers e sils fastitgs da Heinrich ei buc ina piculezza. El ha dil reminent gronds merets che nus Romontschs essan arrivai cun il stan actual dils idioms cheu nua che nus stein oz. Quei ei a Vus tuts denton bein enconuscent.

Jeu haiel giu la quida d'emprender d'enconuscher il Heinrich a caschun da miu cumbat electoral pil mandat dil cussegl grond. Tier nies prem telefonat en connexiun ha il Heinrich detg alla fin da nies discuors – dils plaid seregordel jeu exactamein sco sch'ei fuss oz – “Lorenz lu sentupein nus dus giu Cuera”. Quell'expressiun ha naturalmein tunau sco mèl d'aviuls en mias ureglias, beinsavend che jeu stoppi per quella sentupada era veramein aunc vegnir eligius. Denton, bien Heinrich, sche jeu havess buca giu la cuida d'emprender d'enconuscher Tei, muncass a mi in'impurtont'experiencia dapli en mia veta. Engraziel fetg per Tiu nunstunclenteivel engaschi per ed en favur dils idioms.

Ils Confederai, nos antenats, han gia mussau a nus la via dil success co ins gudogna las battaglia, deplorablamein han els era mussau la via dil nunsuccess, dalla disfatga, dil fiasco e dalla terrada. Duront ils tschentaners ch'els ein stai units han els giu negins adversaris che han giu era mo ina minimala schanza da tschuncanar lur libertad. Denton, e quei duei esser per nus in avis, in avertiment, cu els ein buca pli stai units e cu las dispettas han surpriu il

suramaun – Marignano lai solidar – han els piars tutta forza, piars la battaglia ed ein sfundrai ella nunrelevanza. Quei duei esser per nus in segn, in muossavia: Che mo units havein nus la pussonza, la curascha, mo units havein nus era la perseveronza e la pussevkladad da contonscher las finamiras previdas per defender e mantener era nos idioms, ed in summa la frontscha faviala cumplessiva romontscha, quei era a liunga e buca mo a cuorta vesta. Mo en unitad havein nus la forza necessaria da tschentar tiarms als adherents extremistics d'in lungatg unificau. Nus stuein era buca encurir tier quels da lieunga jastra il motiv per ils actuals problems, nus stuein encurir tier nusez il motiv. Nus, e buca tschels, stuein star stateivels al romontsch, nus, e buca ils auters, stuein el mintgagi star en per ils idioms. Il moviment dallas duas uniuns dils idioms ha numnadamein fatg surstar ils extremists dil rumantsch grischun, els ein stai trumpai e surpri dalla vehemenza ch'il vent ha suflau atras las valladas muntagnardas. Quei vehement suffel sto exnum cuntinuar da piztgar. Mia finamira ei da contonscher sil pli pauc aunc uleriuras 500 commembras e commembers novs per noss'uniun enteifer igl onn current. Oravontut stuein nus mobilisar pli ferm la Foppa e la Lumnezia per nies moviment. Haver ina ferma equipa da pumpiers e negins barschaments ei adina aunc pli favoreivel che d'haver in barschament e negins pumpiers. En quei senn vi jeu destadar in e scadin da Vus culs suandonts cloms:

**Stai si, defenfa. Stai si, sedosta. Stai si, leventa. Stai si, pretenda.**

Miu motto secloma: Trer vid il medem sughet ed en ina direcziun. El sport da cumbat, ella lutga dad um tier um, ni era da dunna tier dunna, dat ei ina regla irremovibla e statteivla: Concentrescha las forzas ed empalescha ellas en ina, numnadamein ell'eguala direcziun. Quei ei lu la schinumada e savens congiurada via che meina alla finamira.

Preziadas collegas e stimai collegs, il cumbat va vinavon. Sco Vus haveis intervegniu a caschun dalla radunonza generala, sco era entras las medias, ei ussa il plan d'instrucziun 21 da metter bein a cavegl. In dils guvernagls leutier essan era nus, respectiv ils adherents dils Pro Idioms. Ina sfid'impurtonta en vesta al fatg che quei plan d'instrucziun 21, inagada entaus en vigur, cuoza quel entgins decennis ed influenzescha evidentamein era la faviala romontscha. Cheu stuein nus procurar per ina convivenza che risguarda oravontut ils idioms. En quei senn, mussei adina puspei preschientscha tier evenimets romontschs, gest aschia sco quei che Vus haveis demussau entochen dacheu. Lu sun jeu da buna fei e pertscharts, che nus vegnin a gudignar ils cumbats vegnents en favur, era dalla favial'idiomatica, ed aschia saver pretender e buca mo da giavischar risguard enviars nossa viarva romontscha.

A mi rest'ei aunc d'engraziar a Vus tuts, in e scadin, per la viva preschientscha. In dueivel engraziel fetg admittel jeu era a Roman Cantieni, iniziand da quei moviment sursilvan. El ha deplorablamein muort ina collisiun da termins buca saviu assister a nossa radunonza ed ha seschau perstgisar. Plinavon gratuleschel jeu da cor als novs suprastonts sco era als reeligi. Ad els ed ellas giavischel jeu egl avegnir bia satisfacziun en lur buca sempel uffeci. Il Vies sustegn ei era vinavon d'eminent'impurtonza per nossa finamira.

Preziadas collegas, stimai collegs, buca dumandei tgei che quels che stattan davontier san prestar per Vus, mobein ponderei bein e dumandei, tgei che Vus saveis porscher per il beinstar dall'uniun, tgei che Vus saveis prestar per il sustegn dil moviment idiomactic.

Ei vivi la viarva romontscha, e viva il romontsch sursilvan

Lorenz Alig, president